

de Civit., c. 14, et clarius in 16. Secundo, credibile est non esse futuram in unico instanti, quia non possent homines, præcipue reprobi, tam multa simul distincte et perfecte cognoscere, sine ingenti miraculo non necessario. Item non oportet ut tam celebris actio uno temporis instanti transigatur; fiet ergo in mora aliqua, per successivam locutionem mentalem, omnibus proportionatam. Tertio, non est improbabile aliqua peccata hominum esse voce sensibili redarguenda, et similiter aliqua bona opera laudanda. Quia, cum illud judicium futurum sit sensibile, et inter homines, qui sese mutuo sensibiliter consipient, ut supra diximus, videtur etiam conveniens ut aliqua ratione fiat locutione sensibili, qui modus est hominibus maxime accommodatus, et ad majorem honorem bonorum, iniquorum vero confusionem pertinens. Hinc Richar., dist. 47, art. 4, q. 3, credit hanc vocalem manifestationem maxime esse futuram de operibus misericordiæ, et de peccatis eis oppositis, propter ea quæ de forma judicii, Matth. 25, narrantur. Quod est incertum, quia non constat ea omnia, quæ Christus ibi dixit, sensibili voce esse transigenda, et quia supra cum Augustino diximus, ea quæ de operibus misericordiæ ibi dicuntur, tantum esse velut indicium quoddam judicii de omnibus operibus faciendi. Hinc etiam Sotus, dist. 47, q. 4, a. 3, putat hanc vocalem redargutionem seu reprehensionem specialiter futuram respectu fidelium, et significat hoc modo esse interpretandam sententiam Gregorii, quod in judicio erit disceptatio sensibilis cum fidelibus peccatoribus, non vero cum infidelibus. Quod non solum est incertum, sed valde etiam voluntarium. Tum quia non habet fundamentum in Scriptura; tum etiam quia maxime videntur reprehendendi infideles, præsertim Judæi, quia, ut Beda significat, Luc. 23, et colligitur ex Scriptura, illis maxime ostendet Christus sua vulnera, ut videant quem pupugerunt, et confundantur. Item, quia si disceptatio sensibilis tantum est futura cum fidelibus peccatoribus per modum accusationis, executionis et redargutionis, ergo, pari ratione, disceptatio sensibilis, quæ per modum laudis fiet cum justis, non fiet cum insignioribus, sed tantum cum mediocribus Sanctis, quia illi tantum dicuntur judicandi judicio discussionis; hoc autem videtur incredibile. Nam, quo fuerint homines sanctiores, eo magis laudabuntur mentali ac sensibili voce et lingua. Igitur nihil censeo posse hac in re dici, quod

SECTIO X.

Quando sit preferenda sententia et iudicium absolvendum.

1. Primum, examinata, comprobata atque conclusa uniuscujusque causa, sententiam esse preferendam, tam est certum, quam quod sit futurum singularum personarum iudicium. Quia iudicium per sententiam consummatur, et ita in citato loco Apoc. 20, postquam dictum est: *Aperti sunt libri, subiungitur: Et iudicati sunt mortui, ex iis quæ scripta sunt in libris secundum opera ipsorum.* Post manifestationem ergo causæ, adhuc superest iudicium, quod nonnisi in sententia consistere potest.

2. *De singulis est sententia distincte pro-*

renda. — Dubitari vero imprimis potest, an omnes mali unica generali sententia judicandi sint, et similiter omnes boni, an vero de singulis propriæ sententiae proferende sint. Mat. enim 25, significatur priori modo preferendam esse sententiam. Nam generatim reprobis dicitur: *Ite, maledicti, etc.; electis autem: Venite, benedicti Patris mei, etc.* In contrarium vero est, quia non omnes sunt eadem pena afficiendi, aut remunerandi eodem præmio, sed unusquisque pro suorum meritorum qualitate. Quapropter dicendum videtur, de singulis esse propriam et particularem sententiam ferendam, uniuscujusque meritis accommodatam, quod iis verbis eleganter docuit Gregorius Nyss., orat. in illud: *Quid uni ex iis minimis fecistis, mihi fecistis: Adhuc versor circa spectaculum terribilis adventus Regis quem describit nobis Evangelium; etiam nunc animus, terrore eorum que dicta sunt, defixus pavore, atque formidine torpet, veluti cernens quodammodo tum ipsum colorum Regem in solio glorioso terribiliter praesidentem; tum infinitas illas Angelorum legiones, Regem undique circumstantes, atque ipsum magnum ac terribilem Regem ex inenarrabili gloria ad humanam naturam despicientem, et omne genus hominum, qui ex quo homines nati sunt, usque ad illam terribilem apparitionem invenientur, ad sese cogentem, et pro merito ac dignitate anteactæ vitae, unicuique sententiam accommodantem.* Etenim, cum sententia nihil aliud sit quam practicum iudicium habens adjunctum imperium, seu voluntatem retribuendi unicuique juxta opera sua, necesse est ut pro diversitate meritorum et retributionis, sententia varietur. Verisimile autem est, postquam de singulis in specie iudicatum fuerit, ad consummandum et absolvendum iudicium, preferendas esse illas duas generales sententias, quarum una reprobis, altera electis communis est. Nam, quia omnes, qui in uno vel altero ordine continentur, in statu, et perpetua vivendi ratione convenient, inter se vero ipsi duo ordines nihil commune habent, quod ad retributionem pertineat, ideo Christus non preferet unam sententiam utriusque ordini communem, sed singulis ordinibus singulas. Unde, quia omnes electi perpetua charitate illi conjungentur, idcirco preferendo sententiam eos ad se vocat, dicens: *Venite, benedicti Patris mei, quos merito hoc nomine appellat, quia divina benedictio, quæ æternam electionem et omnem gratiam complectitur, potissima fons est et*

de Vita contempl., c. 12; Bern., ser. 55 in Cant.

4. An sententia proferenda sit voce sensibili.

— Tertio intelligitur ex dictis, an sententia proferenda sit voce sensibili, vel tantum mentali. Verisimile est enim privatas ac singulares sententias mentaliter esse ferendas, quia cum omnibus sigillatim loqui voce sensibili valde morosum esset, et diuturnum tempus requireret; ita tamen hoc est intelligendum, ut hujusmodi sententiae non tantum ab eis ad quos perlinebunt, sed ab omnibus qui judicio aderunt, cognoscantur, sicut de operibus diximus, utroque enim eadem ratio est. Imo, tota ratio ob quam opera omnibus manifestabuntur, erit, ut sententiae æquitas ac justitia omnibus patere possit. Et ita sentiunt Patres supra citati. At vero sententiae illæ generales, ut credi potest, voce sensibili proferentur, quod sentit Anselm., in Elucid.; et Abulens., Matt. 25, q. 333; et frequentius Scholastici, d. 47, propter rationes tractatas præcedenti sectione; quia cum judicium sit sensibile, et a judice humano et visibili, decet ut etiam sententia proferatur aliquo modo sensibili; ergo saltem proferetur hoc modo quoad generales sententias.

5. Ultimo colligi potest ex dictis, finita sententia absolvendum ac dissolvendum esse judicium. Tum quia nihil jam ibi superest agendum, cum sententia sit veluti ultima forma judicii; tum etiam quia, cum sententia Christi sit efficax, statim sine mora executioni mandabitur, et ideo per modum efficacis imperii ab ipso profertur: *Ite, maledicti, et: Venite, benedicti.* Statim ergo aperietur terra, ut damnatos devoret, et ipsi ire incipient in ignem æternum. Beati vero cum Christo recipientur in cœlum. Quanto autem tempore duraturum sit judicium, hoc incertum esse docet Aug., l. 20 de Civit., c. 1; nam, licet communiter appelletur dies judicii, non tamen ibi dies sumitur proprie pro naturali die, sed pro toto tempore quo fiet judicium; est autem verisimile, nec duraturum tantum per instans, ut supra dictum est, nec magna temporis mora, quia non erit Christo necessaria ad convincendas singulorum conscientias et sententiam proferendam. Quod etiam insinuat verbis illis Christi: *Sicut exit fulgor ab Oriente, et paret usque in Occidentem, sic erit adventus Filii hominis.* Hac enim similitudine declaratur, breve futurum tempus quo durabit Christi præsentia in hoc inferiori mundo in secundo adventu suo. Quod etiam signifi-

catur in illo Malach. 3: *Ego testis velox maledicis, adulteris, etc., ut perpendit Augustinus, 20 de Civ., c. 26; et ita etiam sentiunt Scholastici frequentius, dicta d. 47.*

DISPUTATIO LVIII,

In quatuor sectiones distributa.

DE STATU CHRISTI ET TOTIUS UNIVERSI POST PERACTUM JUDICIIUM.

Explicatis omnibus quæ de secundo Christi adventu, ac generali judicio necessaria judicavimus, ut huic tandem operi finem imponamus, reliquum est ut de statu Christi Domini post judicium disseramus; nihil enim aliud tam de mortali quam de æterna ac beata Christi Domini vita considerandum superstet. Quia vero ubi fuerit corpus, illuc congregabuntur et aquilæ, et quia caput ac totum corpus statum ejusdem rationis, atque idem regnum possidebunt, ideo simul statum beatorum omnium, qui cum Christo regnabunt, explicabimus. Ac denique quia totus hic mundus renovandus est, ut sit amplissimum atque ornatissimum Christi, beatorumque domicilium, idcirco ab hac mundi renovatione disputationem exordiemur, ut tandem in æternæ felicitatis consideratione finiatur.

SECTIO I.

Utrum post redditum Christi in cœlum, statim mundus renovandus sit.

1. Christus post judicium iterum cum beatis ascendet.—Consuetudo orandi versus Orientem.
— Principio statuendum est (quod in quæstionis titulo supponitur), finito judicio, Christum cum omnibus electis, eadem, vel, si fieri potest, majori gloria et triumpho redditum in cœlum, unde ad judicandum descenderat. Hoc de fide certum esse videtur, quia secundum fidem propria sedes et locus beatorum corporum est supremum cœlum, ut supra diximus, de ascensione Christi agentes, et late disputat August., l. 13 et 22 de Civ., per plura capita; cum ergo Christus inde descendit ad judicium peragendum, illo finito illud redditurus est, ut ibi perpetuo cum suis electis regnet, juxta illud Pauli, 1 ad Thess. 4: *Si- mul rapiemur cum illis in nubibus obviam Christo in aera, et sic semper cum Domino erimus; et hoc significavit ipse Christus illis verbis: Venite, benedicti Patris mei, possidete regnum.* Nam in illo verbo, *Venite, suum redi-*

DISPUTAT. LVIII. SECT. I.

tum in cœlum indicat, clarius vero in verbis illis Mat. 24: *Sicut fulgor exit ab Oriente, et paret usque in Occidentem, ita erit et adventus Filii hominis; ubicunque fuerit corpus, illuc congregabuntur et aquilæ.* Ex quo aliqui colligunt, Christum venturum ad judicium ex Oriente, redditum autem versus Occidentem. Ita significat Damascenus, l. 4 de Fid., c. 13, ubi hanc causam inter alias reddit illius antiquæ consuetudinis et traditionis, fundendi preces versus Orientem, cuius meminit etiam Augustinus, l. 2 de Serm. Domini in monte, c. 9; et Justin., q. 118 ad Gentes; Basil., lib. de Spiritu Sancto, cap. 27; Epiph., hær. 19. *Quocirca, inquit Damascenus, ejus adventum opperientes ad Orientem adoramus.* Sed sive redditurus sit versus Occidentem, sive eadem via qua venerat, certum est tamen non permanensur in terra, sed ascensurum in civitatem sanctam Jerusalem, cuius felicitatem describit Joan., Apoc. 21 et 22, concludens: *Ecce venio cito, et merces mea tecum est, reddere unicuique secundum opera sua. Beati qui lavant stolas suas, ut sit potestas eorum in ligno vitæ, et per portas intrent in civitatem.*

2. Reprorum ad inferos descensus qualis.

— Secundo hinc fit, eadem certitudine sentiendum esse, finito judicio, reprobos descensuros in infernum, juxta illud: *Ite in ignem æternum, quod expresse traditur Apocal. 20: Infernus et mors missi sunt in stagnum ignis.* Unde probabiliter colligitur, ad vocem et imperium Christi aperiendum esse magnum terræ hiatum, ut corpora damnatorum descendant. Cum enim illa corpora subtilitatis dote non sint affecta, non possunt terræ corpus penetrare, neque oportet hoc miraculum tunc fieri; facilius enim est terram aperiri ad devoranda illa, maxime cum hiatus ille terræ deservire possit ad perfectam mundi purgationem et renovationem, ut postea dicemus. Quin potius, ut hoc obiter dicamus, multi existimant illum hiatum terræ perpetuo permanensur oculis pervium, ut possint beati oculis etiam corporeis pœnas damnatorum intueri, nam, ut Lactantius ait, l. 7, cap. 26, *omnis turba impiorum pro suis facinoribus in conspectu Angelorum, atque justorum perpetuo igni cremabitur in æternum.* Atque idem docet Gregorius, hom. 40 in Evang.; et Ansel., in Elucid.; et Magist., cum Theologis, in 4, d. 50; qui tamen non declarant, illam visionem futuram esse corporalem, neque ad statum et perfectionem beatorum necessaria videtur. Multoque minus necessarium ac decens vide-